

مسرحية للأطفال

قرية الزهور

تأليف وإخراج

عبدالرحمن المناعي

1994

(في قرية تقع بالقرب من الجبال سكانها يعيشون على زراعة المحاصيل الغذائية ويسود علاقاتهم الحب والتعاون .. يحدث أن يهاجم القرية قطاع من الذئاب الذي يتسلل للقرية الهادئة فيعيث في أرجائها ويفترس الحيوانات الأليفة نجمة فتاة من القرية تعيش على زراعة الزهور وبيعها على الطريق العام الذي يمر بالقرية .. والممثلة التي تقوم بدور نجمة تقوم بدور الروي للأطفال .. تسير لمقدمة المسرح)

نجمة هذي قرية الزهور ... قرية صغيرة تقع على طريق المدينة . وتحيط ابها جبال رفيعة .. أهل قرية الزهور متعاونين يحبون بعض .. وعملهم يعتمد على الزراعة وتربية الحيوانات وفي كل صباح

(موسيقى - أغنية " أشرقي " بعد نهاية الأغنية تنصرف نجمة يستوقفها حمد)

حمد وين يانجمة ؟

نجمة الشمس اطلعت .. والورود تنادينني.

حمد وشخبار الورود ؟

نجمة اذا مالحت عليها بتذبل .

حمد مستعجلة ؟

نجمة طبعاً .. مافي شي يؤخرني عن عملي .. وبعد اشوي بتمر السيارات ونجمه لازم تكون سلتها متروسه من الورود والزهور وأنت ؟

حمد انا البارحة جمعت كل محصول الطماط والخيار والحين انتظر الشاحنة علشان اوديه وابيعه في المدينة .ألسنه المحصول ممتاز .

نجمة طبعاً وإنشاء الله الثمن يكون ممتاز .

حمد يارب .. الله يسمع منج .

نجمة الله كريم .. يالله روح لعملك وخلي اروح لعملي .

(يخرج حمد مسرعاً .. ونجمه تنصرف من الجهة الأخرى يستوقفهما صوت جاسم وقاسم وهم أصدقاء نجمة وحمد يرتدون أقنعة مضحكة)

نجمة (للأطفال) مثل ماقلت لكم أول ماتطلع الشمس كل أهل القرية وخاصة مجموعة الأصدقاء .. قبل لا يروحون شغلهم يجتمعون في ساحة القرية ويمارسون لعباتهم المسلية وعقبها كل يروح حق شغله .. ومجموعة الأصدقاء فيها حمد وهو مزارع نشيط وعنده مزرعة عوده وحيوانات كثيرة وهو ريال يحب إن يطور نفسه ويكبر شغله دائماً.. وهذاك جاسم ويسمونه أهل القرية الراعي لأنه عمله رعي الأغنام والخرفان .. عنده قطع من المواشي كبير وجاسم يعاملهم معاملة جيدة وكل يوم يحاول يكتشف مراعي جديدة .. علشان هالشكل الله منعم عليه ومبارك له في حاله ... (يتقدم الحداد غاضباً) هذا اهو الحداد قاسم

قاسم

بس ؟

نجمة

ايه بس. **(تدفعه بطريقة مضحكة فوق ظهر الراعي)** لا تزعل يا قاسم .. يا أطفال هذا اهو حداد ومخترع القرية اهو اللي يصنع الفؤوس والمناجل والأقفال والشبابيك **(تنصرف وتعود مرة أخرى)** اسمحوا لي نسيت اقولكم عن نجمه واللي انا بامثل دورها.. نجمه تزرع الزهور عندها حديقة كبيرة من الورود والزهور تعتني بها كثير وفي كل صبح تجمع سلة كبيرة من الزهور وتوقف على الشارع العام اللي يمر بالقرية وتبيع الزهور والورود للناس اللي يعرفون قرية الزهور ويحبون ورود نجمه وزهورها .. واللحين اسمحوا لي لأنه الشمس بتزعل مني لأنني تأخرت على شغلي **(يستوقفها صالح المتردد)**

صالح

نجمة .. نجمة.

نجمة

خير؟

صالح

أولا صباح الخير.

نجمة

صباح النور .. وثانياً ؟

صالح

هذي بذور طماط وهذي بذور شمام أي أحسن ازرع طماط ولا شمام.

نجمة

اسأل أبوك ولا عمك هم افهم مني ومنك.

صالح

بس أنا أقول يعني .. يعني بذور **(يستمر في ترده بينما نجمة تتسلسل خارجاً .. وعندما يكتشف ذهابها يجري خلفها منادياً)** نجمة .. نجمة .. الحين شلون اعرف إذا كان الطماط أحسن ولا .. ولا بذور ؟ انا نسيت اسم هذي البذور عيل لازم ازرع البذور اللي نسيت اهي ابذور شنهو وانتظر لين تطلع وتكبر واعرف اهي بذور ايش والله مشكلة انا دائم عندي مشكلة وكل الناس في شغلهم ولاحد يساعدي .. خلاص انا اقول ابذور بامي .. ها لا أكيد بذور فاصوليا **(شخص من خارج المسرح يكرر نهاية كلماته يخاف)** يمه شنهو هذا لا انا أقول هذي بذور قرنبيط ... هذا مب صوتي .. من انت ؟ من هناك .. أكيد يتراوالي اللحين لازم اعرف هذا بذور طماط ... وهذي ابذور .. اكيد يذور باذنجان ها جان بسم الله الرحمن الرحيم .. لازم اشوف منهو هذا اللي بيبي يخرعني **(يبحث في ارجاء المسرح ويجد الفزاعة)** عرفت أنتي يافزاعة .. ليش تبين تخوفيني ؟ لا وتاركه شغلك ونايمة.

الفزاعة

مب انا اللي خوفتك .. صدقني مب انا.

صالح

عيل من اللي كان يقول لي ماماما ..

الفزاعة

والله مب انا .. لا ني كنت نايمة.

صالح

تاركه شغلك وحراسة الزرع من الطيور ونايمة يافزاعة.

الفزاعة

تعبت يا صالح طول الليل وانا واقفة في البرد .. قلت ارتاح شوي.

صالح

وحمدي يدري انك نايمة؟

الفزاعة

(يخوف) حمد لا مايدري .. أرجوك .. أرجوك ابعدها الكيس عني ..

صالح	وليش ابعد الكيس عنك.
الفزاعة	ماحب ريحة بذور الشممام.
صالح	شنهو ؟
الفزاعة	اقولك ماحب ريحة ابذور الشممام .
صالح	انتني أحسن فزاعة في الدنيا وعلشان انتني شاطرة وعرفتني ابذور الشممام ماراح اقول حق حمد انك كنتني نايمه وتاركه شغلك .. وبعد إذا تبيني اخليك ترتاحين أكثر قولي لي .. ازرع بذور الطماط ولا بذور الشممام ؟
الفزاعة	أول بعد ابذور الشممام عني.
صالح	(يرمي كيس البذور بعيدا) ياالله بعدتها عنج ياالله قولي لي.
الفزاعة	اسمع يا صالح كل نوع من الزرع له موسم .. واللحين ازرع الشممام لأنه موسمه ..
صالح	اللحين موسم زراعة ... زراعة شنهو ؟
الفزاعة	الشممام يا صالح الشممام.
صالح	ايه صح الشممام يا صالح .. الشممام يا صالح .
الفزاعة	واللحين أوعدني انك ماتقول حق حمد إنني كنت نايمه.
صالح	لا ماقوله.
الفزاعة	عيل خلني أروح ارتاح شوي قبل لا يرجع حمد (تخرج الفزاعة بينما صالح يفكر في كلامها)
صالح	ازرع الشممام احسن صح انا قلت الشممام احسن عيل خلاص أروح ازرع الشممام (في طريقه للخارج ناسياً كيس بذور الشممام .. تدخل نجمة تحمل سلة زهور)
نجمة	ورد ابيض ورد احمر .. ياسمين .. فل .. خذ لك ورده .. (إيحاء بوجود شارع وسيارات ونجمة تمارس عملها بهمة ونشاط .. تلاحظ وجود كيس البذور على الأرض تلتقطه) هذا بذور شممام .. ها هذي يذور صويلح (يدخل قاسم مسرعاً)
قاسم	قوه يانجمة.
نجمة	هلا قاسم
قاسم	ليش واقفة ؟ الورود والزهور خلصت ؟
نجمة	لا بس حصلت هذي الكيس.
قاسم	اشفيه ها ؟ فلوس فلوس .
نجمة	لا يايبه هذا كيس صالح المتردد فيه بذور شممام.

قاسم	بذور شمام (ينصرف ويعود لها) اليوم صنعت جرس كبير وباعلقه على باب المدرسة
نجمة	بس المدرسة فيها جرس.
قاسم	لا يانجمة هذا جرس مبرمج.
نجمة	مبرمج .. يعني شلون يا عبقرى؟
قاسم	أقول لك شلون . يعني مدير المدرسة يبرمج الجرس على موعد الحصص وموعد الفسحة وموعد نهاية المدرسة .. والجرس ايطق ابروحه.
نجمة	يعني طول اليوم يرن في الوقت المحدد؟
قاسم	طبعاً.
نجمة	أنت عبقرى يا قاسم أنت أحسن حداد في قرية الزهور.
قاسم	لا أرجوك في كل القرى.
نجمة	لاتزعل في كل القرى .. لكن أنت اللحين وين رايح؟
قاسم	نسيت اقولك ان الفحم خلص وباروح ايبلي كم جيس فحم (يخرج)
نجمة	مع السلامة ... حياكم على الورد الزين .. حياكم على الفل والنرجس والياسمين.
(أصوات سيارات ونجمة تمارس عملها بهمة ونشاط وبعد ذلك تعود للمسرح وسلتها خالية وهي متعبة .. يدخل حمد وهو يحصي النقود التي في يده .. ويدخل جاسم الراعي .. نشاهد قاسم يمر في الخلف يحمل كيس من الفحم)	
جاسم	قاسم أساعدك؟
قاسم	ما تقصر شكراً.
حمد	ما خلصت شغل اليوم؟
قاسم	باودي كيس الفحم وبارد لكم.
نجمة	ها .. بعت المحصول يا حمد؟
حمد	الحمد لله .
جاسم	وانا اليوم .. يافرحتي .. يافرحتي.
نجمة	قول عاد وشصار ؟
جاسم	خميسه.
حمد	خميسه !!

جاسم	خميسه عنزتي العزيزة.
نجمة	شفيها ؟
جاسم	ولدت .. يابت لي تيس وسخله.
نجمة	تستاهل.
حمد	يتربون في عزك.
جاسم	ها ...
حمد	قصدي يتربون في حظيرتك . (يدخل قاسم الحداد)
قاسم	انا رجعت.
نجمة	بارك حق الراعي.
قاسم	جاسم حبيبي مبروك .. مبروك (يحتضنه بحرارة) تستاهل تستاهل مبروك.
نجمة	اتعرف على ايش تبارك له؟
قاسم	اعرف .
جاسم	اتعرف؟
قاسم	نعم اعرف ... جاسم شعنده غير جميعه يابت تيس .. ورده يابت اسخله وخميسه يابت اثنين.
جاسم	انت ساحر؟
قاسم	نعم ساحر وادري ان ريحتك مب حلوه.
جاسم	ريحتي مب حلوه.
قاسم	ريحة مواشي غنم خرفان.
جاسم	وانته ريحتك فحم.
نجمة	وحمد شنهو ريحته ؟ (يدورون حوله)
قاسم	انا اقول ريحته طين وسماد.
نجمة	غلط.
جاسم	غلط ... ريحته ريحته اكيد ريحته خس وبقل وخيار.
نجمة	هذي ريحته كل يوم بس اليوم ريحته فلوس.

قاسم	فلوس وينها وينها ؟
حمد	انا اليوم بعث محصول المزرعة وبكره باروح باشتري سماد وبذور علشان ازرع.
جاسم	وانتي ريحتك
قاسم	انا اقول ريحة نجمة ورد.
حمد	فل.
جاسم	ياسمين (صوت رنين جرس من خارج المسرح يتسمر الممثلون للحظة ثم ينطلقون فرحين وهم يرددون)
الجميع	سعيد ساعي البريد سعيد ساعي البريد .
نجمة	لحظة يا جماعة (يتوقفون .. تلتفت للأطفال) وانتوا بعد لحظة لأنني نسيت أعرفكم على العضو الأخير في مجموعة الأصدقاء.
الجميع	سعيد ساعي البريد سعيد ساعي البريد (صوت جرس ويدخل سعيد يقود دراجته بجانيه)
نجمة	هذا اهو سعيد ساعي البريد وهو في نفس الوقت اللي ايبب لنا أخبار المدينة وفي الليل يسولف لنا عن أخبار الدنيا ..
جاسم	هلا حيا الله صديقي سعيد ...
سعيد	أسعار المواشي في ارتفاع ياراعي.
جاسم	مالي رسايل؟
سعيد	حد من هلك مسافر؟
جاسم	لا.
سعيد	هوايتك المراسلة ؟ أتعرف حد في البلدان الثانية ؟
جاسم	لا
سعيد	إذا كان لا ... ليش كل يوم تسألني ؟ من بيكتب لك ياراعي.
جاسم	نعم صحيح.
نجمة	وانا ياساعي البريد.
سعيد	انتي لك هالرسالة .. وريحتها ورد.
نجمة	شكرا ياسعيد.
سعيد	وين حمد؟

حمد	نعم انا اهنيه.
سعيد	لك رسالة من شركة الأسمدة.
حمد	انتظرها من زمان . مشكور يا سعيد.
جاسم	والله قهر .. اسمع ياسعيد انا ابيك تكتب لي حق شركة المواشي اللي في المدينة.
سعيد	إنشاء الله .. وشتبي تكتب لهم؟
جاسم	اي شي .. المهم ان يردون علي وتبينني مكاتيب مثلكم (يتقدم قاسم الحداد ويزيح جاسم من طريقه ويشير لسعيد عن وجود بريد يخصه)
سعيد	قاسم الحداد .. طبعا لك هالكتاب.
قاسم	كتاب .. كتاب .. (يأخذ الكتاب ويسير لزاوية المسرح)
نجمة	كتاب شنهو يا حداد؟
سعيد	ماراح يرد عليك .. قاسم من يستلم كتاب عن المخترعات والأجهزة ينسى الدنيا (يلاحظون دخول صالح المتردد وهو يبحث عن كيس البذور)
صالح	وينك ياكيس الشمام (قاسم يردد نهاية كلمته) يمه رجع لي الصوت مره ثانيه .. انا ادور بذور الشمام (يستمع للصوت مرة أخرى) لا أكيد هذا واحد يبي يخوفني ..
نجمة	شتدور يا صالح ؟
صالح	ها .. انا ادور ابذور الشمام
قاسم	مام مام
صالح	انت اللي اتخرعني ؟
قاسم	لا انا كنت رايح ايب الفحم وحببت اضحك وياك.
صالح	علشان انتة من أطفال القرية .. لكن الفزاعة قالت لي ان اللحين موسم الشمام.
حمد	الفزاعة ؟ وأنت وين شفتها ؟
صالح	ها ...
سعيد	قول الصحيح يا صالح .
قاسم	الح الح الح ..
صالح	قولي له لايسويلي هالشكل.
نجمة	بس يا قاسم .. يالله رد على سؤال حمد وين شفت الفزاعة؟

صالح	انا ... نا ...
نجمة	انت شنهو ؟
حمد	انت رحت مزرعتي ؟
صالح	لا بس انا .. (يحاول الانصراف) باروح ادور كيس البذور ..
حمد	بس اول اتقول لنا وين شفت الفزاعة ؟
صالح	اقول الصدق ؟
نجمة	الصدق وبس
صالح	انا حصلتھا نايمه هناك.
حمد	نايمه.
نجمة	وعلشان قلت الصدق .. هذي اهي بذور الشمام (تناوله كيس البذور)
صالح	لكن ماقلتوا لي ازرع بذور الطماط ولا بذور الشمام؟ (ينصرفون عنه) ياجماعه ياجماعه .. ازرع الطماط ولا الشمام. (يخرج خلفهم)
نجمة	وهالشكل تمر ايام قرية الزهور عمل وحب وتعاون الكل سعيد والكل فرحان وفي ذيك الليلة صار شي غريب .. شي يخوف .. أهل القرية كانوا يستعدون للنوم وفي نص الليل .
	(هجوم الذئاب على القرية تنفذ بطريقة خيال ظل ... عواء وصراخ .. واستغاثات .. وفي صباح اليوم التالي حمد وجاسم يدخلان المسرح)
حمد	ياخسارة ماكنت اعتقد ان بيصير هالامر ..
جاسم	أعيال خميسه الصغار الحلوين ماتهنو بحياتهم .. كلتهم الذيا به.
حمد	خربوا زرعنا دمرو ارضنا ..
سعيد	كان ابوي ايقول لي ان الذئاب رحلت من حول القرية من زمان ومن يوم اطلعت السيارات والشوارع خافت وهربت للجبال البعيدة لكن اللي صار البارحة.
جاسم	البارحة ماقدرنا انسوي شي.
حمد	وشنسوي يا جاسم احنا ماتعودنا على مثل هالامور .. وما كنا حاسبين حسابنا على ان حيوانات مفترسة تهاجم قريتنا ..
جاسم	ايا على عنزاتي اللي راحو .. ايه على خرفاني ..
سعيد	ماخلو مكان في القرية .. وخاصة ان الكل يود بيته من الخوف.

جاسم	وشتبيهم ايسوون من يقدر يطلع يقاوم أكثر من مائتين ذيب هاذول متحدين مع بعض مسعورين .. ايا على عنزاتي (يدخل قاسم وييده بعض القطع الحديدية)
قاسم	وين نجمه ؟ وين نجمه ؟
حمد	خير يا قاسم وشصار ؟
قاسم	أهل القرية للحين خايفين كل ايطالع خلاله .. اللي زرعه تلف واللي مواشيه انقتلت ..
حمد	الذئاب مع الفجر رجعت من مكان مايات .
قاسم	وشللي يمنعها ماترجع الليلة
جاسم	ترجع الليلة
حمد	طبعا محد في هالقرية كان يعتقد ان بيصير ها اللي صار محد كان مستعد يواجه الطوفان اللي صار البارحة .
قاسم	لكن نجمه وين ؟
سعيد ت	حصلها تبكي على حديقة الزهور الذيابه ماخلوا مكان ما خربوه
قاسم	انا باروح ادورها (تدخل نجمه تسير حزينة ويدها غصون وورود ذابله وخلفها سعيد وبعض الأهالي)
نجمة	الشمس اطلعت على العادة لكن الأمر مختلف.
حمد	نجمه ..
نجمة	الذئاب المفترسة ماعادت تفرق بين الحيوانات والنباتات وحطمت كل شي ..
سعيد	لازم في أسباب دفعت قطيع الذئاب لمهاجمتنا.
حمد	الحيوانات عندها أسباب؟
سعيد	طبعا ولا ليش ماهجمت طول السنين اللي راحت.
نجمة	صحيح .. وليش تهجم بها الأعداد الكبيرة.
حمد	أمر ايحير.
قاسم	لازم انفكر في عمل
جاسم	احنا انفكر في مقاومة الذئاب ؟
حمد	ولا من يقاومهم نأجر ناس ايقاومونهم من بدالنا.
جاسم	بس احنا متعودين على الزراعة والرعي الاهتمام بالأرض.

سعيد	وعمرنا ما فكرنا إن احنا نحارب أو نقاتل .
قاسم	بس اللحين لازم انتحرك والّا الذيا به مراح يخلون لنا شي بيدمرون أرضنا وبيقتلون كل مواشيننا.
جاسم	انا اعتقد ان هالقطيع مار مرور ومراح ايهاجمنا مره ثانيه.
حمد	وشللي اياكد لك هالكلام .. واذا اهجموا علينا مره ثانيه شبنسوي ها ..؟
جاسم	شنسوي ..
سعيد	ماعاد في وقت للتردد .. لازم انفكر.
قاسم	انا قررت اني اصنع مصايد ونوزعها في مداخل القرية .. ولازم ابدأ اللحين وابيكم تساعدوني .
نجمة	كم فخ بتسوي يا قاسم خمسه .. عشره .. والذئاب مئآت.
حمد	لا هذا مب حل احنا نتكلم عن أهل القرية اللي الحزن والخوف مسيطر عليهم .. لازم نفكر بشكل أفضل نسوي شي يضمن لنا حماية بيوتنا وأملاكنا ولا إذا هالقطيع هجم علينا مره ثانية مراح يخلي شي (يتبادلون الحديث والاقتراحات بينما نجمة تسير لمقدمة المسرح)
نجمة	قرية الزهور تعرضت لي اول هجوم للذئاب المفترسة ولانهم ماتعودو على ها الأمر احتارو كثير في الحل وشلون يقدرن يمنعون الخطر عن قريتهم . حمد وقاسم وسعيد وجاسم الراعي ومعهم بياعة الزهور نجمة راحو واجتمعوا مع أهالي القرية وفكروا شلون يحمون قريتهم من الذئاب.
	(تخرج نجمة وأصدقائها .. بعد قليل يدخل صالح المتردد .. ومعه الفزاعة التي حطمها قطيع الذئاب)
صالح	انا كنت رايح اعتذر لك يافزاعه علشان انا علمت حمد عليك وخفت لا يعاقبك .. لكن الذيا به لحقوني .. ركضت بسرعة ودخلت بيتنا .. وضاعت بذور الطماط والشمام ... مسكينة يافزاعة .. الذيا به المجرمين كسروا اعظامك ..
الفزاعة	انا خايفة وايد يا صالح.
صالح	لا تخافين يا عزيزتي .. انتي فزاعه طيبه وصالح بيصلحك وبتردين مثل الأول ..
الفزاعة	الذيا به بترجع مره ثانيه؟
صالح	انشاء الله ماترجع لاني خايف اكثر منك (اصوات من الخارج تستفسر عن نجمة والورود)
قناص	وين بياعة الورود
صالح	اليوم مافيه ورود .. الذئاب خربوا قريتنا ... نجمة ماتبيع الزهور اليوم (يعود لمحادثة الفزاعة) مسكين حمد لا كل أهل القرية مساكين قطيع الحيوانات المفترسة دمروا

القرية وانت ياعزيزتي انا باشتري لك شعر جديد وملابس أحلى من الأول **(تتكرر الاصوات مره ثانيه)** قلت لكم الذئاب هاجمت قريتنا البارحه .. واحنا كلنا مشغولين .. انفكر اندور حل حق ها المشكله.

(يدخل صاحب الصوت الأخير وهو قناص صائد الحيوانات المفترسة الذي يبيع جلودها لتجار الحيوانات)

قناص	هلا .. هلا .. قلت لي مافي زهور اليوم ؟
صالح	لا مافيه .
قناص	وليش يا صديق ؟
صالح	انت ماتدري ان الذيا به هاجموا قريتنا البارحه ..
قناص	والله ... ذيا به حقيقه ؟
صالح	عيل فيه اذيا به اتهاجم قريه لوما كانت حقيقه.
قناص	كم واحد يعني خمسه عشره ؟
صالح	اسمع هذي اقولك قطع قطع كامل يمكن مئتين ذيب.
قناص	حلو ..
صالح	ها !
قناص	لا اقول وايد والله .. ومته اهجمو عليكم ؟
صالح	يمكن نص الليل ..
قناص	تمام تمام ..
صالح	شنهو اللي تمام ؟
قناص	لا .. لا ... اقول انت شسمك ؟
صالح	انا صالح ..
قناص	الله وهذي الفزاعه صديقتك يا صالح ؟
صالح	ايه بس الذيا به كسروها .. مزعوا اثيا بها .
قناص	مسكينه اسمع يا صالح انت تعرف هذي شنهو ؟ (يشير لبندقته المعلقه على كتفه)
صالح	طبعاً هذي بندقه .. انا اشوفها في التلفزيون.
قناص	بس في التلفزيون ؟

صالح	احنا .. ماعندنا حرب .. هذي قرية الزهور انت ماتعرفها ؟
قناص	صحيح .. صحيح بس هذي البندقية يا صالح لعبة يعني مب حقيقية ... (يحدث نفسه) هذي اللي اتيب الخير هذي اللي اتخليني اصيد الحيوانات واسلخ جلودها وأبيعها بفلوس كثيرة ... اسمع يا فالج.
صالح	انا صالح اشفيك انت ..
قناص	اسمع يا عزيزي صالح .. انا مامريت اهنيه انساني مع السلامة.
صالح	شفيه ها الريال ؟!!
قناص	انت قلت لي نص الليل اتيي الذيا به ؟
صالح	نعم.
قناص	عيل مع السلامة .. (يخرج قناص .. وهو يرقص فرحاً)
صالح	أكيد هذا مجنون .. (تدخل نجمة وأصدقائها)
جاسم	الوقت يمر ولازم نبدأ فوراً.
سعيد	الكل لازم يستعد.
قاسم	أهل القرية كلهم مستعدين للعمل.
حمد	عيل وشننطر يا الله نتوكل على الله ونبدأ .
قاسم	يا الله يا صالح احنا محتاجين حق الجميع ..
حمد	يا الله يا صالح خل الفزاعة تولي وتعال معانه علشان نحافظ على قريتنا .
صالح	والفزاعة ؟
قاسم	لين قدرنا نمنع قطع الذئاب من الهجوم على قريتنا بنعالج الفزاعة .
حمد	وانا باعطيك بذور شمام من بدال اللي ضيعتهم.
قاسم	عيل يا الله يا جماعة .. اهل القرية بانتظارنا.
نجمة	(ينصرفون بهمة ونشاط .. تسير نجمة لمقدمة المسرح .. موسيقى وأغنية "يا الله نتساعد" وأهل القرية يبنون السور في خلفية المسرح) أهل القرية يا أطفال قررروا أن يبنون سور من الخشب والأسلاك حول قريتهم .. ومثل ماشفتوا قناص صياد الوحوش عرف حكاية الذئاب من صالح .. قناص يا أطفال مهنته ان يصيد الحيوانات وياخذ جلودهم يبيعه على تجار الجلود في المدينة الكبيرة ... أهل القرية استمروا في عملهم وبعد ساعات (بعد انتهاء الأغنية يدخل جاسم متسلل يسير بخوف) ها ياراعي أشوف رجعت ..

جاسم	ها ..
نجمة	اشفيك تعبتي ؟
جاسم	لا بس بعد اشوي بتغيب الشمس وانا خايف يانجمه .
نجمة	إذا كلنا خفنا عنزاتك وخرفانك بتخلصهم الذيا به ..
جاسم	ايه عليهم .. بس شاقدر اسوي ..
نجمة	تتعاون مع أهل القرية ..
جاسم	بس القرية كبيره واللحين بيصير الليل ولا خلصنا نص السور .
نجمة	احنا لازم نتعب ونحاول .. احنا في حالة حرب يا جاسم (يدخل سعيد ومعه واحد من الأهالي) اشوف رجعتوا كلكم.
سعيد	احنا بنبي سور حول القرية كلها يعني مئات الأمتار يانجمة.
نجمة	يعني نتراجع.
سعيد	لا بس بناء السور بييله وقت (يدخل باقي الأصدقاء)
قاسم	مب جاسم وسعيد .. كل أهل القرية خايفين.
حمد	نعم ومن قرب المغرب وكل اشوي واحد يهرب لبيته والسور بييله شغل وايد.
صالح	وانا تعبتي وايد ..
نجمة	تبون نستسلم.
حمد	لا يانجمه بس احنا مانقدر نجبر الناس .. بعدين ..
نجمة	اسمعوا كلكم احنا لازم نحذر اهل القرية من الخروج الليلة
جاسم	بس انتوا ليش متأكدين ان الذيا به بترد الليلة .
حمد	ولازم انحذرهم بعد من ترك حيواناتهم خارج الحضاير
سعيد	واللي ماعنده حضيرة يدخل حيوانته داخل البيت ..
صالح	وانا باودي الفزاعه تنام معاي في بيتنا.
قاسم	عيل يا الله انروح اندور في القرية ونحذر كل الناس.
نجمة	ولاتنسوا تشعلون النار يمكن تبعد الذيا به (يخرجون .. بينما نجمة تعود لسرد الحكاية)

نجمة

أول يوم السور اللي أهل القرية بدوا يسونه مخلص وصار الليل كل أهل القرية الزمو بيوتهم وتحصنوا داخلها وكانت الهجمة الثانية لقطيع الذئاب.

(يتكرر مشهد هجوم قطيع الذئاب نشاهد مشاعل النار بقرب أبواب منازل القرية ويدخل قناص ببندقيته وضحكاته العالية وخلفه مرافقه شديد وفي الصباح)

قناص

ها ها ها .. ثلاثة اذياه كبار حلوين .. حلوين انا قناص الذكي .. الله هذول يسون لهم عشرة آلاف ريال .. ياحلو الذياه ... وخاصة اذا هجموا على ناس مغفلين مثل أهل ها القرية . مصلحة قناص في استمرار هجوم الذئاب على القرية ... حلو كل ليلة ثلاثة ولا أربعة باصير مليونير .. اسمع خذ ود ها الذياه السيارة ... واسمع ود البندقية بعد السيارة بسرعة ... وانتو **(موجهها خطابه للأطفال)** انا مالي دعوه بصيد الذئاب ... انا ريال مار بقرية الزهور وابي اشترى ورد من عند نجمة

(يدخل جاسم وقاسم .. بينما قناص وتابعه يتعدون في طرف المسرح)

جاسم

وبعدين يا قاسم اذا الذياه كل ليلة بيهجمون على قريتنا ماراح يخلون لنا شي .. ليلتين وكل ليلة يقتلون اللي يقتلون ويخربون ارضنا وزرعنا .. ليش ماتكلم يا قاسم ليش ماترد ..

قاسم

وشتبيني اقول ..

جاسم

وليش اتصارخ ...

قاسم

ماعليه يا جاسم انا مقهور .. يالسين انشوف هالحيوانات تقضي علينا واحنا ساكتين ..

جاسم

لكن احنا بنينا السور ... وبعد اشوي أهل القرية بيصحون وبنكمل بنين السور ...

قناص

بينون السور .. يعني بيمنعون الذياه من الدخول في القرية ... وانا ماقدر اروح للحيوانات في الجبال .. الاغبياء بيضيعون علي الفرصة الذهبية **(صوت ينادي من الخارج)**

حمد

يا أهل قرية الزهور الكل يستعد لازم انكمل السور اليوم الكل يستعد للذهاب لحدود القرية الكبار والصغار .. كل واحد يقدر على العمل يستعد .. يا أهل قرية الزهور ... **(يتكرر النداء .. يدخل حمد وسعيد ونجمة .. وخلفهم صالح)**

نجمة

قاسم ليش قاعد؟

قاسم

انا مقهور على عجزنا عن مقاومة هالحيوانات المفترسه.

نجمة

لا احنا مب عجزانين .. احنا بدينا في بناء السور واليوم لازم نكمله ..

قاسم

وساعتها بنحصن قريتنا من هجوم الذياه او اي حيوانات.

جاسم

يارب اتساعدنا على اكمال بناء السور اليوم.

سعيد

عيل يالله نتوكل على الله

قناص	(يستوقفهم قناص) ياباعة الزهور ابي باقة فل.
نجمة	اليوم مافيه ورد يا سيد ..
قناص	انا محب .. نعم محب الزهور والياسمين ..
حمد	بس ياسيد محب الزهور والياسمين ما تنمو مع الذيا به والوحوش.
قناص	اعوذ بالله ذيا به ووحوش .. علشان هالشكل انتي ماتبيعين ورود.
نجمة	نعم وكل أهل قريتنا يحاولون يمنعون الذيا به من الهجوم على قريتنا.
قناص	جميل .. جميل .. ولقيتوا الحل للقضاء على الوحوش المفترسة؟
صالح	نعم احنا بنينا سور حول القرية خشب وأسلاك .. واليوم بنكمل السور ..
حمد	نعم ياالله ياجماعه احنا نسينا السور.
نجمة	عن اذنك ياسيد محب.
قناص	بس سمعوني أول .. انا عندي حل يمنع هجوم الذيا به عنكم.
نجمة	(تسير نجمة لمقدمة المسرح بينمل نشاهد مناقشة صاحبة بين قناص وأهل القرية) قناص يا أطفال حاول يقنع أهل قرية الزهور انه بيعهم بنادق مثل اللي عنده .. ويعلمهم شلون ايصيدون الذيا به وبالتالي يستفيد من صيد الحيوانات .. لكن أهل القرية ..
حمد	لا ياسيد محب احنا مانريد انجازف باعمارنا في الليل ومع بنادق احنا ماتعلمنا عليها ..
سعيد	احنا يكفيننا منع الذيا به عن قريتنا .
قاسم	نعم هذا راينا كلنا ..
نجمة	عيل ياالله ياجماعه نتوكل على الله (يخرجون)
قناص	لا مب معقول فرصة ذهبية راحت عليك يا قناص .. اسمع يا شديد احنا لازم انروح نرتاح اللحين ننام اكيد الليلة بنصيد اكثر من البارحة (شديد يشير له بحركة تعني السور) لا ما اعتقد انهم بيقدرون يكملون السور .. واللييلة بتهمم الذيا به وقناص بيشتغل بيدقيته ياالله ياشدشد للنوم والراحة وخل المغفلين يشتغلون .
صالح	(يدخل صالح والفزاعة) انا متأكد يافزاعه هذا اهو الشخص اللي قالى عن شي معلق على كتفه ... وأكيد الأصوات اللي سمعناها البارحة كانت من ذاك الشي اللي يسمونه البندقية .. هذا الريال امبين عليه شرير ويمكن له علاقة بالذيا به ...
الفزاعة	(تضحك) شلون يعني اهو صديق الذيا به ؟
صالح	مادري والله بس مبين عليه شرير وأكيد وراه شي ...
	(ضحيج من خارج المسرح ويدخل الجميع فرحين بانجازهم بناء السور)

حمد	عيل كل واحد يروح يرتاح الليلة وينشوف اذا كانت الذيا به تقدر تدخل قريتنا ولا لا .
سعيد	إنشاء الله ماتقدر ..
جاسم	يارب .. لاني مليت من ريحة الغنم والخرفان طول الليل .
قاسم	ليش وانت وين حاط قطيعك ياراعي ؟
جاسم	معاي .
سعيد	معاك وين ؟
جاسم	معاي في غرفة النوم .. كفايه اللي كلوهم الذيا به .
نجمة	عيل يالله اشعلوا المشاعل وادعوا الله ان يمنع عنا شر قطيع الذئاب ..
(يتكرر المشهد الليلي .. نسمع صوت الذئاب فقط ولكن لا نشاهدها .. قناص وشديد يبحثان عن الذئاب)	
قناص	لا .. لا هذا قهر شلون قدروا ينجحون ويبنون السور ويحطمون أحلام قناص الصياد اكبر صياد حيوانات في العالم .. لا انا لازم اسوي شي .. نعم لازم اسوي شي (شديد يشير له تجاه الجبال) لا ياشدشد شلي يوديني الجبال .. اهنالك ابلاد الوحوش. والذيا به اتي بريولها لين عندي لكن ها المتاعيس اقطعوا رزقي .. يالله ياشديد .. لازم اندور حل (مع طلوع الشمس اهل القرية يتوافدون على ساحة القرية فرحين بانجازهم)
قاسم	اللحين نقدر نرد حق أعمالنا ..
جاسم	واقدر أناام بروحي بدون الخرفان والغنم ..
سعيد	نعم اللحين كل شي بيرد مثل ماكان ...
حمد	ياجماعه كل يروح لشغله
قاسم	لازم نصلح كل اللي خربوه الوحوش المفترسة لازم نتعاون أكثر علشان قرية الزهور ..
(نجمة تعود لمواصلة سرد الحكاية)	
نجمة	طول النهار وأهل القرية الطيبين يعملون بجد واجتهاد .. مستانسين لانهم قدروا يمنعون الذيا به من دخول قريتهم .. ويوم صار المساء اجتمعوا في ساحة القرية يحتفلون بنجاحهم ..
(أثناء احتفال أهل القرية يدخل قناص وتابعه متكرين ويتجهون للسور وفي أيديهم معاول يقيمون بعمل فتحة في السور)	
قناص	واللحين وبعد ماهدمنا السور نروح نستعد لليلة الجميلة لازم نصيد أكثر من خمس ذيا به .. خل أهل هالقرية الأغبياء يفرحون (يخرجان)

أهل القرية يا أطفال احتفلوا واستانسوا لكنهم مآدروا بالشرير قناص اللي مستفيد من هجوم الذبابه على قرية الزهور ويوم فشل في إقناعهم ببيع البنادق شفتوه شلون اهو ومساعده حطموا السور بدون مايشفونهم أهل قرية الزهور ..	نجمة
الليلة بنام بدون ريحة المواشي.	جاسم
حمد ممكن تخلي الفزاعة تنام عندي الليلة؟	صالح
بس الليلة يا صالح لانها لازم ترد على عملها بعد ماعم السلام قريتنا.	حمد
شكراً يا حمد .. الفزاعة تونسني وخاصة من الأصوات الغريبة.	صالح
صحيح يا قاسم انت سمعت صوت ؟	حمد
نعم تذكرت انا سمعت مثل صوت المدفع ..	سعيد
والعجيبه اني شفت بعض الدم على الأرض.	قاسم
هذي دم عنزاتي وخرفاني ..	جاسم
خلاص اللحين كل شي انتهى وبننام في سلام ...	حمد
(يخرجون ويتكرر ما يحدث في الليلة الأولى .. ونشاهد قناص ومساعده شديد وهم يحملون بعض الذئاب ويخرجون فرحين يتوافد أهالي القرية فرعين)	
شللي صار يا جماعة ..؟	سعيد
شلون ادخلت الذبابه مره ثانيه ؟	حمد
حمد حمد ثلاث خرفان وعنزتين وتيس يا حمد .. راحوا راحوا ..	جاسم
أكيد السور فيه فتحه.	قاسم
حديقتي خربتھا الذبابه داست على زهوري.	نجمة
زين ان الفزاعه نامت وياي ..	صالح
سمعتوا الطلقات؟	قاسم
نعم سمعنا ..	الجميع
هذا أكيد السيد محب اهو الوحيد اللي غريب عن قريتنا	حمد
دائماً يمر يشتري الورود ويروح الجبل.	نجمة
وعنده شي ايلقه على كتفه.	صالح
بندقية.	سعيد

حمد	والصوت اللي سمعناه اهو صوت البندقية ..
نجمة	أكد السيد محب له يد في الموضوع .
سعيد	من بدال ما نيلس انتكلم انروح انشوف اشلون دخلوا الذبابه وشصار في السور .
حمد	نعم لازم انعرف وشصار في السور (يخرجون بينما تتقدم نجمة لجهة المسرح)
نجمة	واستمر هالحال أهل القرية ينامون ليله امين وفي الليلة الثانية يكسر قناص السور وتدخل الذبابه القرية أهل القرية عرفو ان في حد يحطم السور .. وعرفوا ان تصليح السور كل مره مو هو الحل علشان هالشكل فكروا في طرق تحمي السور .. وأطفال القرية نجمة وحمد قاسم وجاسم و سعيد فكروا كثير في وسائل لحماية قريتهم وهالشكل صارت قرية الزهور قرية خايغه هدف للذئاب المفترسة (في طريقها للخروج يدخل قناص وتابعه شديد)
قناص	أريد ورد فل يا أحلى بياعة زهور في الدنيا.
نجمة	سيد
قناص	محب .. محب الزهور والورود .
نجمة	بس أنت تعرف ان احنا في مشكلة.
قناص	الذبابه ؟
نجمة	نعم.
قناص	قلت لكم بس انتوا ماتسمعون الكلام ..
نجمة	وشقلت لنا ياسيد محب ؟
قناص	القوه ماتغلبها الا القوة .. والذبابه مايوقفها سوركم الضعيف .
نجمة	سورنا وقفها ياسيد محب .. لكن هناك يد حطمت السور .. يد لها مصلحة في دخول الذبابه قريتنا .
قناص	يد .. يد من يابياعة الزهور؟
نجمة	الله اعلم لكن أهل القرية مصرين على منع دخول الذبابه وماراح يشترون منك البنادق.
قناص	انا مابيع بنادق يابياعة الزهور .. بغيت أساعدكم (يحادث نفسه) بينون السور مره ثانيه ... بكسره مره ثانيه ... انا قناص .. قناص الصياد .. نعم صياد الوحوش .. مساكين أهل القرية أغبياء (يعود لمحادثة نجمة) عيل ماعندك فل .. خسارة انا أحب الورد .. وخاصة الورد الأبيض رمز السلام والمحبة (بضحك) مع السلامة يابياعة الورد .. (يخرج .. بينما نسمع ضجيج من الخارج .. ويدخل أطفال القرية)
حمد	خلاص يانجمة حصلنا فكرة جميله تبعد عنا قطيع الذئاب.

جاسم	قاسم الحداد عبقري
سعيد	قدر يسوي جهاز عجيب يساعد السور في منع الوحوش .
نجمة	لكن ياجماعه انا اعتقد ان مشكلتنا مب مع الذيا به بروحها .. انا اظن ان السيد محب له يد في الموضوع .
قاسم	الجهاز مب لمنع الذيا به السور منعهم .. لكنه لمنع أي شخص يحاول تخريب السور .
نجمة	شلون يعني ؟
حمد	اسمعوا يا أطفال احنا متأكدين ان السور قدر يمنع الذيا به من الهجوم على قريتنا ..
سعيد	علشان هالشكل احنا كملنا بناء السور ..
حمد	لكن هناك شخص يكسر السور واحنا مب متأكدين منهو .
جاسم	علشان هالشكل قاسم الحداد قدر يصنع هالجهاز العجيب
نجمة	جهاز وعجيب .. يعني شيسوي ؟
قاسم	انا اقولك .. احنا متأكدين ان السور يكفي لمنع هجوم الحيوانات المفترسة .. لكن في شخص يهدم السور .. عيل لازم نحافظ على السور .. علشان هالشكل احنا وصلن كل اسلاك السور بها الجهاز.
نجمة	ايه والجهاز شيسوي ؟ يعني يمد الاسلاك بالكهربا ؟
قاسم	لا هالجهاز يصدر اشعاع قوي اذا حد اقترب من السور .. اشعاع يحرق ..
حمد	احنا نبي نحفظ وياكم بسر الجهاز وشلون يشتغل ..
سعيد	الللحين بيصير الليل وكل القرية بتروح اتنام
جاسم	وها الجهاز الموصل بسور القرية بنحطه اهنيه
قاسم	وأي واحد من أهل القرية او منكم يا اطفال اذا شاف شخص غريب يتجول في الليل ...
نجمة	وخاصة الريال الغريب اللي اسمه محب.
حمد	لازم يصرخ وبشكل قوي ويقول : الشر ابعيد.
قاسم	والللحين انا بوصل الجهاز بالسور ونجربه معاكم.
نجمة	وانا باعد من الواحد للثلاثة وكلنا انقول : الشر بعيد.
قاسم	انا وصلت الجهاز .
نجمة	واحد اثنين ثلاثة

الجميع	الشر بعيد (<i>إشعاع يصدر من خلف المسرح</i>)
نجمة	نعم يصرخ واللي يسمعه يصرخ معاه ويقول : الشر ابعيد
قاسم	احنا جربنا الجهاز وما باقي الا انحنا نفتح اعيونه عدل ونتساعد كلنا ... السور بيمنع الذئاب من دخول القرية ..
حمد	وجهاز قاسم الحداد بيمنع أي شخص من الاقتراب من السور .
سعيد	ومكان الجهاز ا يكون سر من بينا.
جاسم	والكلمة اللي بتشغل الجهاز اهي : الشر ابعيد.
حمد	صلحنا السور.. وقاسم سوا لنا هالجهاز العجيب.
نجمة	ولما انشوف حد ننتظر ولين قرب عند السور نصرخ مع بعض : الشر بعيد.
سعيد	ياجماعة الشمس غابت.
حمد	عيل كل يروح بيته وينشوف شيصير .
	(يخرجون .. يتكرر ما يحدث في الليالي السابقة أصوات الذئاب تأتي من بعيد .. يدخل قناص وتابعه شديد)
قناص	ياالله يا شديد دور .. انا اسمع اصوات الذيا به .. لكن اهم وين ؟ يا وحوش اطلعو ياكم قناص الصياد ملك الوحوش ... انا اسمع اصواتهم بس اهم وين ؟ دور يا شديد .. انا بندقيتي جاهزه ... (شديد يشير له بوجود السور) يعني قصدك انهم بنو السور مره ثانيه .. لا لا لا هذول مغفلين اشلون يعطلون عمل قناص ... انا ما قدر اروح الجبل هناك الوحوش يخوفون لكن اهنيه اقدر اصيدهم بسهولة وانا منخش ورا هالبيوت ... ياالله يا شديد لازم اروح انشوف السور لازم انحطم السور علشان الذيا به تدخل ويبدأ قناص في الصيد .. ياالله يا شديد (يخرجان بينما تتسلل نجمة وحمد الى مقدمة المسرح)
نجمة	ياالله يا اطفال حمد قول لنا اذا قناص وصل السور ..
حمد	استعدي يانجمة ...
نجمة	وانتوا استعدو ..
حمد	الشر ابعيد
نجمة	الشر ابعيد .
	(مؤثر إشعاع .. صراخ قناص ودخوله المسرح وخلفه شديد يجريان بخوف والدخان يتصاعد منهم .. نجمة وحمد يضحكان .. يخرج قناص وتابعه وتصحو القرية ويتوافد الناس لمعرفة ما حدث)
حمد	الظلام كان شديد بس ..

نجمة	هذا أكيد السيد محب من اول ماشفته وانا أقول ان له يد في الموضوع.
جاسم	وشصار ياجماعة من اللي صاده الاشعاع؟
سعيد	اثنين مب واحد.
جاسم	من هم؟
نجمة	محب وتابعه .. السور منع دخول الذيا به ..
حمد	واعتقد ان السيد محب كان يبي الذيا به تدخل القرية علشان اهو خواف ومايقدر ايروح ايصيد الذيا به في الجبل .
سعيد	علشان هالشكل .. يحتمي ببيوت القرية .. ويعرف ان الذيا به تهجم علينا بأعداد كبيرة.
جاسم	مادري من قال حق قطيع الذيا به عن عنزاتي وخرفاني .. حد دارها علي ..
حمد	بس اللحين امنت شرهم ياراعي ..
جاسم	وافتكيت من ريحة الخرفان . (يدخل قاسم)
قاسم	انا تأكدت من السور ومن الاسلاك .. واللحين خلونه انتأكد من الجهاز .. اسمعوا باعد من الواحد الى الثلاثة وبعدها انقول كلمة السر علشان نتأكد من صلاحية الجهاز .. ياالله واحد اثنين ثلاثة
الجميع	الشر ابعيد (يصدر اشعاع في خلفية المسرح) واللحين اقدر اقول لكم ان الجهاز ممتاز ..
نجمة	عيل من اليوم لازم انفتح اعينه اكثر ونحذر من السيد محب.
حمد	بنحتاج للعمل اكثر حتى انرجع كل شي مثل ماكان.
جاسم	وعنزاتي اللي كلوهم الذيا به شلون بيرجعون؟
قاسم	الله يعوضك عنهم خير ياراعي.
نجمة	عيل خلونا نبدأ هالصباح بهمه ونشاط ونتوكل على الله
قاسم	الشمس اطلعت وانا بوقف الجهاز عن العمل ..
نجمة	عيل ياالله صباحكم ورد وباسمين وتوكلوا على الله ..
	(يخرج الجميع .. وبعد لحظات يدخل صالح ومعه الفزاعة)
صالح	خلاص يافزاعه حمد يبيج اتردين للحقل علشان تحرسين الزرع من الطيور ... انتي ونستيني وايد ..
الفزاعة	وانا اشكرك على كل شي صلحتني واشترت لي ثياب جديدة.

صالح

ايه بس انا كل يوم بازورچ في الحقل ..

(يدخل قناص وتابعه شديد يسيران بخوف وحذر)

قناص

هيه .. انت .. ايه انت تعال.

صالح

عرفت انت راعي البندقية.

قناص

اسمع يا فالح.

صالح

انا قلت لك انا اسمي صالح وهذا الفزاعه صديقتي.

قناص

نعم صحيح صحيح ... انا اسف يا صديقي.

صالح

(يشير للقماش الذي يلف يد قناص) وشللي سوا فيك هالشكل؟

قناص

ها والله مادري كنت اطبخ وحرقتني البخار ..

صالح

وبعد صديقك احرقه البخار ؟

قناص

اسمع يا صديقي ... وانا في المدينة سمعت ان أهل قرية الزهور أذكاء قدرو انهم
يمنعون الذبابه من دخول قريتهم

صالح

لا ونقدر نمنع اي واحد من تحطيم السور اللي بنيناه .

قناص

عجيب وشلون ؟

صالح

(يضحك) قاسم الحداد قدر ايسوي جهاز يصدر إشعاع يحرق اللي يقرب من السور ..

قناص

الله والله انه عبقرى.

صالح

طبعاً.

قناص

وشلون يشتغل ها الجهاز ؟

صالح

يشتغل بس في الليل لانه الذبابه ماتهمج الا في الليل.

قناص

لا اكيد انتوا ناس اذكاء وايد .. بس ماقلت لي شلون يشتغل؟

صالح

يشتغل لين الناس الطيبين قالو له كلمة السر ..

الفزاعة

(تحاول اسكاته) بس يا صالح.

قناص

جهاز يشتغل بكلمة السر؟

صالح

طبعاً .. قاسم ذكي وهو يبي يمنع الناس الشريرين من الاقتراب من السور مو الناس
الطيبين .

قناص

وها الجهاز وين موجود ؟

صالح	ماقولك .. هذا سر.
قناص	ايه بس انا صديقك.
صالح	لا .. لا ماقولك (قناص يخطف الفزاعة من صالح ويسلمها لشديد ويمسك بصالح بقسوة وعنف)
قناص	اسمع اذا ماقلت لي وين مكان الجهاز باكسر فزاعتك ..
صالح	لا مب قايلك ..
قناص	باكسرها قطعه قطعه ..
صالح	أرجوك اتركنا اتروح ..
قناص	اذا تبني تروح .. قولي الجهاز وين محطوط ؟ .. ماتبي اتقول زين عيل شوف فزاعتك وشبيصير فيها .. ياشديد اكسر يد الفزاعة (شديد ينفذ الأمر وصالح يبكي)
صالح	لا ارجوكم ارجوكم .. الفزاعة مالها دعوه ..
قناص	واللحين بتقول ولا لا .. شديد اكسر اليد الثانيه ..
صالح	لا لا باقول ..
قناص	ياالله قولي ياحلو وين الجهاز؟
صالح	هناك (يشير لمكان الجهاز .. قناص يضحك .. يتقدم ويأخذ الجهاز ويحطمه .. شديد يرمي الفزاعة بينما صالح يولول)
قناص	اسمع قول حق أهل القرية الأغبياء .. انا قناص الصياد محد يقدر يضحك على قناص الصياد (يخرج قناص وشديد بينما تدخل نجمة وجاسم من الطرف الآخر)
جاسم	صالح وشفيك ؟
نجمة	مب هذا السيد محب اللي كان معاك ؟
صالح	هذا مب محب هذا اسمه قناص صياد الحيوانات المفترسه تاجر الفرو .
جاسم	وشكان يبي منك ؟ (صالح يبكي)
نجمة	قول يا صالح قناص الشرير وشسواي لك ؟
جاسم	تكلّم يا صالح ..
صالح	كسر الفزاعة ..
نجمة	بس ليش ؟
صالح	علشان اعلمه عن مكان الجهاز ..

نجمة	مكان الجهاز .. وعلمته ؟ (صالح لا يرد) علمته يا صالح .. ليش ليش قلت له.
صالح	لأنه بيكسر الفزاعه ..
جاسم	واللحين شالعمل (ينادي) يا قاسم .. يا احمد يا سعيد يا اهل قرية الزهور (يدخل الجميع)
نجمة	اسمعوا يا اهل قرية الزهور .. احنا عرفنا ان اللي ورا ها القصة الشرير قناص ..
جاسم	وقدر يضحك على صالح ويحطم الجهاز .. وهذا معناه انه بيحطم السور وبيخلي الذيابه تدخل قريتنا مره ثانيه .
نجمة	الللحين عرفنا ان احنا مانحارب حيوانات ماتفهم نبني سور ونمنعها من مهاجمتنا ..
جاسم	صح احنا اللحين انحارب إنسان اختار ان يستفيد من مصيبتنا ها الإنسان عنده عقل يدبر .. واحنا لازم انفكر شلون انقاومه.
صالح	انا السبب سامحوني .. سامحوني .. انا خفت على الفزاعه .. ارجوكم سامحوني .
نجمة	خلاص يا صالح الحزن ماينفع اللحين .
قاسم	نعم احنا لازم انفكر في حل لمشكلتنا ..
جاسم	قناص قدر يحطم الجهاز والسور لازال بيحميننا من قطع الذيابه.
قاسم	ومع ذلك لازم انفكر في حل للموضوع .
حمد	عيل لازم نجتمع مع اهل القرية (يخرجون .. بينما نجمة تواصل سرد الحكاية)
نجمة	اجتمعوا أهل القرية وتكلمو وايد .. اقترحو امور كثيره واخيراً قدروا انهم يتوصلون لفكرة حلوه ... وابتدو يخططون لتفيذها لكن دخل عليهم الليل وكلّ راح بيته يدعون الله ان يبقى السور سليم وماتهجم عليهم الذيابه ... شوفوا شللي صار (يدخل قناص وتابعه)
قناص	امسوين جهاز يفتكرون انهم بيغلبوني .. لكن لا انا قناص الصياد حطمت جهازهم والحين يا شديد نحطم السور ولين صار نص الليل نبدأ في صيد الذيابه الله الليلة باصيد عشرين واحد .. يا الله انحطم السور (يدخل رجلان ملثمان يدخلان من الطرف الآخر يتسللون في الظلام قناص يختبئ)
الرجل1	سكان القرية أغبياء كل راح بيته ونام.
الرجل2	أنت حطمت السور ..
الرجل1	كسرته تكسير شللي يودينه الجبال في الليل اهنيه بين البيوت افضل .
الرجل2	يعني بتهجم الذيابه الليلة ..
الرجل1	نعم وبتشتغل بندقية ماهر القناص .

قناص	ماهر القناص .. يعني فيه واحد غيري عرف بسالفة الذيا به .. لكن مايهمم الذيا به وايد .. لا والمغفل وفر علي تحطيم السور من بدال مانروح نهدم السور ماهر القناص المغفل قام بالعمل نيابة عني .. عيل اسمع ياشديد نختبي اهنيه لين تهجم الذيا به .
الرجل1	نعم نختبي اهنيه لين تهجم الذيا به .
لرجل2	اهل القرية مساكين نايمين مايدرون بالدنيا ..
قناص	وانتوا بعد ماتدرون بالدنيا . عبالكم بس انتوا اللي بتصيدون الذيا به .
الرجل1	الله بكره .. بنصير أغنياء ايقولون ان الذئاب تهجم على القرية بأعداد كبيرة ... والحمد لله ان محد من الصيادين يدري عن هالقصة.
قناص	مسكين .. يقول محد يدري مسكين ... ننظر لين نص الليل
	(اصوات الذئاب ويتكرر ما يحدث في كل ليلة .. يخرج قناص من مخبائه .. يبحث عن الذئاب) وينهم .. وينهم ماشوفهم ادخلو .. يالله ياشديد دور .. وين راحوا الذيا به .. مب قال ماهر القناص انه حطم السور عيل ليش اسمع الذيا به ولا اشوفهم.
	(يخرج الرجلان المثلثان ويصوبان بنادقهم تجاه قناص وتابعه بينما أهل القرية يدخلون بالمشاعل)
رجل1	اللين بتشوفهم يا قناص الشرير ..
قناص	انت ماهر القناص ..
رجل2	لا .. احنا صيادين قرية الزهور ..
نجمة	ونجحت فكرتنا .
حمد	نعم قناصين القرية اقدروا يضحكون على قناص.
قاسم	واللحين تبني انقطك ورا السور علشان اتصيد الذيا به على راحتك.
قناص	لا أرجوكم .. أرجوكم توبه .. خلاص توبه .
جاسم	أنت أول عندك بندقية لكن احنا خذينا بندقيتك .. وبنشوف اشلون بتصيد الذيا به .
صالح	انا اقول انربطه اهنيه ونروح احنا نحطم السور ونخلي الذيا به تدخل ..
جاسم	لا أرجوكم عنزاتي خرفاني.
قناص	أرجوكم سامحوني توبه خلاص انا تبت.
قاسم	لازم يحصل عقابه
صالح	نعم لازم انعاقبه
حمد	احنا بنترك أمرك للأطفال وهم يقررون عقابك.

نجمۃ	المهم ان قريتنا قرية الزهور ارجعت للسلام والامن والمحبه.
حمد	انا اقول عقاب قناص انحنا نطرده من القرية في هالليل ونشوف ايش بيكون مصيره.
جاسم	عيل يالله اذلف عن وجهنا.
قناص	بس انا اخاف من الظلام (يخرج قناص وتابعه شديد)
نجمۃ	(تخاطب الأطفال المشاهدين) شكراً لكم ولمساعدتكم لنا (أغنية الختام)